

鄉黨圖考補證

刻鄉黨圖考補證序

聞之不熟三禮不能通鄉黨篇三禮浩繁儀禮尤苦難
讀故注鄉黨諸家多未詳密盡善江氏圖考博矣詳矣
而精神偶不照處亦不無疏誤吾友王儀堂校官爲之
補其缺證其誤徵引經典參考焉以會其通彙萃眾家
精擇焉以求其當洵讀鄉黨者不可不讀之書而爲江
氏之諍友也書初脫稿未標目曾見示予爲參訂一二
去今三十年矣前五年予自四川歸聞其書已要刪而
成凡六卷題曰鄉黨圖考補證竝著三禮條辨若干卷

方欲索讀儀堂旋沒於東平學署門人爲歸櫬予聞訃
往哭之間其書於其家則曰未佚俟送闕久之竟未見
也今茲春渟于稗鶴明經以圖考補證來徵序且敘其
事曰去歲有攜書求售者發視則余前所校儀堂之書
也色焉駭認其故則又惻然急言之丁丈榦圃榦圃慨
然卹以二百金且謀鋟之版以廣其傳首事補證條辨
繼之願校而序之其勿辭予聞而感焉展卷讀之筆迹
辭氣宛如對故人欲如曩之疑義相與析胡可得也獨
念文人著述湮沒不傳者多矣豈盡書之不足傳哉家

貧力不足以付剗劖子孫不能守則棄之鬻之鬻不得
其人則又秘之而不傳或壤之爲己有致令寒士一生
心血之所注消歸於無何有之鄉而冥冥中抱恨終古
可勝歎哉顧安得如二君者樂善不倦如此其亟也儀
堂不死可以慰矣旣而念予與儀堂交最久茲事顧不
能爲力獨賴二君相與成此舉也徒滋愧矣校畢書此
付之竝埒札記於卷末死者如可作未知以爲然否也
光緒二十七年冬十一月同里張庭詩序

昔朱子作論語集註鄉黨一篇其中關於禮學者於舊
註稍有更易但意存發明義理故猶未及專加考證至
晚年作禮經通解原簡所定分門別類宏綱細目包舉
靡遺果及手成洵治經學者之圭臬不惟論語鄉黨一
篇而已 本朝江慎修氏撰鄉黨圖考一書蒐獵綦富
條理秩然息心據斷惟期精確然千慮一失未免仍留
罅漏之憾戊申夏黃邑淳于稗鶴孝廉出其同里王儀
堂先生鄉黨圖考補證見示并屬爲之序余惟聖人教
人亟重夫禮故門人記云子所雅言詩書執禮雅言者

常言也夫既屬常言將禮稱宮室器用服御之等惡在不附先傳之例雖然教其以常言盡乎論語書中篇之子罕第九首揭之曰子罕言罕言者難以言也是通篇所記卽子貢所謂性與天道不可得聞者也篇之鄉黨第十又首揭之曰似不能言不能言者不以言過行也是通篇所記卽夫子自謂吾無隱乎爾吾無行不與二三子者也蓋二篇相次一凡主於微言之教一更進於無言之教則欲以禮觀聖人者當求諸動容周旋盛德之至若所載之制度名物皆可略已惟是秦火以後舊

典日湮讀聖人之經者每遇制度名物之瑣重亦不克
研究輒就昧昧遑言義理乎哉今先生之書於江氏所
編綴專掇其與本篇相密切者或施駁正或用申明而
又能融會貫通乎往古陳籍先哲緒論擇之精而語之
詳豈非好學深思務求其是不苟異亦不苟同乎則以
爲江氏之諍臣也可以爲朱子之功臣也亦無不可
光緒三十有四年八月灘宋書升

敘

光緒戊申春

鴻恩

應通志分纂之聘丁榦圃太守出王

儀堂先生鄉黨圖攷補正屬刊於沛南越七月工竣太

守又復屬敘

鴻恩

既重先生之學又感太守之義乃爲

敘曰吾郡先哲通經者萊陽有趙北嵐氏文登有畢九

水氏棲霞有郝蘭皋氏牟陌人氏皆卓卓者也而其書

或傳或不傳致使後之學者未獲讀其全書時從前儒

記載始得悉其學之源流如畢如牟雖間有刊行而其

書寥寥無幾趙氏又一無所刊僅鈔本詩詞爲收藏家

所珍祕良可慨也。今太守出貲爲先生刊遺書以廣其傳，較諸聊城楊氏之刊九水山房文存、福山王氏之刊周公年表，其厚誼爲何如也。然此非先生當日願望所及也。猶憶癸巳夏，先生歸自觀城，家無負郭之田，以課讀爲生聞。鴻恩有志治經，以三禮條辨明堂禮制，攷養

靜齋札記，屬爲校讐，繼又以是書相屬。

鴻恩

素敬服先

生之學之博，不敢以世情待先生，因爲僭訂若干條而先生虛心相從，逐條改正，閒取校識之語，有足相發明者，埒列各條下，獨於圭璋琬璧圖說未及改正，蓋先生

別有所據也一日與先生論郡中先哲著述某也刊行以傳某也散佚無徵先生曰余所著書傳非所望所望者不散佚耳言之若甚戚焉乃今於續修通志之時而太守爲先生刊書適成得與畢氏郝氏牟氏之書輝映於一編之中不至如趙氏今文尙書三禮春秋左傳諸經說湮沒而不彰也烏乎先生之書傳矣然非太守之力又何由傳哉秋九月同里後學涪于鴻恩謹識於金綾泉上

自敘

讀書以通經爲務通經以論語爲先論語亦豈易通哉
學者束髮受書首誦論語始而句讀繼而解詁以爲無
不通矣乃年愈長而疑竇愈多先儒謂不通羣經不能
通一經旨哉言乎鄉黨一篇尤論語中之難通者也蓋
鄉黨所記動涉禮制大而朝廟祭祀聘享細而衣服飲
食容止考核不精歧誤層出新安江慎修先生援據注
疏作鄉黨圖考十卷引證詳明嘉惠後學者良厚也百
餘年來學者奉爲圭臬幾於家有其書矣然禮家聚訟

最爲紛糾江君守一家言襲謬承譌亦所不免

漸鴻不

揣愚昧輒以鄙見所及訂其譌誤復爲之引伸觸類補其闕略其於鄉黨無甚關係者姑仍之猶未暇悉辨也亦有江君辨說已明而後人更以他說亂之者今復爲證明之稿凡數易分爲六卷質之張君二南同年

庭詩

王君菰畦內翰

守訓

兩君復多所貺益焉壬午夏四月

余選觀城教諭行篋無書觀城地僻又無書可考此事遂中輟逮癸巳旋里而菰畦已以進士入詞館二南亦以進士仕四川方有孤陋寡聞之懼而有涓于茂才者

鴻恩字稚鶴

博學強識見余所著三禮條辨及養靜齋

札記明堂禮制考取而校之皆有是正洵畏友也急以
是編相浼亦爲訂正數條旣余復館於北關丁煒之家
其家藏書甚富爰取前日已讀未讀之書重自檢閱又
增補若干條訂正若干條庶江君原書可稱完璧矣乎
光緒乙未冬十月黃縣後學王漸鴻儀堂識

王儀堂傳

張庭詩撰

王君儀堂諱漸鴻儀堂其字也同治元年舉人生有至性家貧授讀以養親母沒後父老且病勸父納妾以待父不從乃納老婦命爲繼室不數日而父沒終身奉繼母如父命蓋不忍傷親意也勤苦力學讀一經兼淹貫諸經以會其通尤潛心於三禮作明堂禮制攷拜攷皆彙萃諸家言以定其從違其謂稽首頭至地者謂冕弁至地顙不能至地則前人所未及不喜敖氏儀禮集說以其於鄭注不顯肆攻駁而陰破之多失古義又以江

氏鄉黨圖攷學者所必讀之書而未盡縝密故補正之以學行與修縣志光緒八年選授觀城教諭地瘠學校廢弛幾於倚席不講旣蒞任殫心啟迪以經義文藝督課之亶亶不怠士子始知嚮學丙戌己丑大計皆以卓異進階旋憂去服除補東平州學正踰年卒著有鄉黨圖攷補正三禮條辨養靜齋札記等書弟治熙字穆堂副貢勤學能文與兄齊名顧經學未逮則年不永也壬戌科考取官學教習偶咯血醫家遽投以止血劑遂成痼疾未授職而沒士論惜之

張庭詩曰同治元年儀堂與余同舉於鄉試嗣後每相過從輒以經義相切礪晚年所造益純粹余愧弗逮也光緒廿三年余自四川歸而儀堂以是年卒於東平貧甚門人爲歸其櫬余往哭之問所著書尙存行篋後聞其書歸丁幹圃氏幹圃將次第梓行之噫儀堂其不没乎

鄉黨圖考補證卷一

黃縣王漸鴻著

圖說上

諸 侯 宮 寢 朝

宮隅

諸嬪
御世
婦寢

夫人
小寢

夫人

景寢

次舍

在內
官府
宮室

路

燕

路

治

雉

觀

庫

外城

宗廟


次舍

府庫

宮隅

西園圖

廷 廟 社 總 圖



案古者廟社之制廟東社西皆在雉門內也周禮小宗伯掌建國之神位右社稷左宗廟鄭注謂在庫門內雉門外之左右江氏圖考因之然鄭氏未有確據其朝士注云郊特牲譏繹於庫門言遠當於廟門廟在庫門內見於此是鄭君所據唯此耳陳祥道禮書引禮運仲尼與於蜡賓出遊於觀之上及穀梁傳送女母不出廟門諸母兄弟不出闕門以證廟在雉門內今考廟在雉門內又見周禮司儀職曰出及中門之外問君客再拜對中門卽雉門由廟門出及雉門之外則廟在雉門內又

閔公二年左氏傳曰聞於兩社爲公室輔杜注謂兩社之閒朝廷執政之所在執政所在雉門內也

治朝所在兩社

者右國社左亳社范甯穀梁注曰立亳之社於廟之外

以爲屏蔽則社稷宗廟皆在雉門內矣又哀公三年傳

云五月辛卯司鐸火

司鐸蓋司宮中巡警之處

火踰公宮桓僖災可

見宗廟與公宮相連又云季桓子御公立於象魏之外

象魏卽雉門之兩觀也桓僖廟災而公出於象魏之外

以避火廟在雉門內又一確證矣凡此諸證皆見戴東

原考工記圖

孫敬軒

希旦

禮記集解曰縣之詩乃立

皋門皋門有伉乃立應門應門將將乃立冢土戎醜攸
行冢土大社也君子將營宮室宗廟爲先此詩上章先
言作廟乃以自外及內之序言之首作皋門次作應門
次立社稷社稷與宗廟左右相對天子在應門內諸侯
在雉門內曉然矣 案縣之詩敘古公亶父之事當時
猶是諸侯之制以皋門爲大門應門爲中門並路門爲
三門其後以皋門應門爲天子之制又加庫門雉門爲
五門而以雉門爲中門諸侯三門庫雉路亦以雉門爲
中門天子諸侯宗廟社稷皆在雉門之內也孫氏宗劉

原父之說謂天子止有皋應路三門故謂宗廟社稷在

應門內耳

天子五門辨見庫門外朝圖

戴東原亦有天子三門之說

金誠齋

鶚

從之引書顧命諸侯出廟門俟下云王出在

應門之內謂廟在應門內今案鎬京宮室因諸侯之舊其時止有皋應路三門廟固在應門內然顧命以殯宮爲廟不得引爲宗廟之證

祭法諸侯爲百姓立社曰國社諸侯自爲立社曰侯社疏曰國社在公宮之右侯社在藉田又郊特牲疏引條牒論曰稷壇在社壇西俱北嚮營並壇共門白虎通引

春秋文義曰天子社稷廣五丈諸侯半之 案社皆有
稷小宗伯建國之神位右社稷是在國中者有稷也士
師若祭勝國之社稷則爲尸是亳社有稷也詩載芟序
曰春藉田而祈社稷是藉田之社有稷也凡社稷皆同
壇異壇

曲禮在府言府在庫言庫鄭注曰府謂寶藏貨賄之所
庫謂車馬兵甲之處陳氏禮書曰天文東壁爲文府西
奎爲武庫漢書於府言財物之府於庫言武庫則庫門
兵庫在焉 案府庫對文則異散文則通曲禮在府言

府在庫言庫對文則異也大學未有府庫財月令開府
庫出幣帛樂記車甲衅而藏之府庫是貨財幣帛車甲
之藏通名府庫 府庫在庫門內江圖府庫在小寢之
旁誤也周禮大府玉府內府外府皆因其所藏之物而
異其名惟玉府掌王之燕衣服衽席牀第凡褻器此當
在宮中其他府庫無在宮中者內府掌受九貢九賦九
功之貨賄良兵良器王氏與之謂在庫門之內今考內
府當在祖廟之東聘禮記曰賓之幣唯馬出其餘皆東
注曰藏之內府疏曰天官內府職凡四方之幣獻之金

玉齒革兵器凡良貨賄入焉注云諸侯所獻國珍彼天子禮諸侯亦當有內府諸侯自相朝聘其貨賄珍異亦入內府據此注疏則天子諸侯內府皆在祖廟之東明矣
朝聘之禮皆行之於祖廟賓之幣唯馬出其餘皆東藏之內府足知內府在祖廟之東也其餘府庫則皆在庫門之內魯桓僖災季桓子命藏象魏曰財可爲也舊章不可亡也象魏在雉門此時季桓子立於雉門之外因見府庫而念及象魏故曰財可爲也舊章不可亡則府庫在雉門之外庫門之內明矣玉海一百六十九引三禮義宗曰庫門因其近庫卽以爲名方氏

懋曰天子五門四曰庫門藏器械於此

守訓案古者庫門之名因門旁蓋藏車故謂之庫門

見六

書故

月令審五庫之量蔡邕章句曰車庫兵庫祭器庫樂

器庫宴器庫證以樂記車甲衅而藏之府庫府庫在庫門之內甚明

漸鴻案天子六寢見周禮諸侯三寢無正文當從注疏爲是天官宮人掌六寢之脩鄭注曰六寢者路寢一小寢五路寢以治事小寢以時燕息焉賈疏曰天子六寢則諸侯當三寢禮記喪大記君夫人卒於路寢孔疏曰

諸侯三寢一正曰路寢二曰小寢夫人亦有三寢一正
二小此皆正解也江君宮室考亦引注疏爲說而此圖
君與夫人皆正寢一小寢三是此圖誤也金誠齋禮說
謂天子諸侯降殺以兩天子六寢諸侯當四寢恐不然
金氏禮說多與江氏圖考爲難獨此則沿江圖之誤諸侯之於天子有降殺以兩
者亦有半之者諸侯三寢半於天子也胡竹邨燕寢考
亦謂諸侯正寢一小寢三夫人亦正寢一小寢三以喪
大記孔疏謂諸侯夫人三寢兼正寢言爲非今據春秋
公羊傳有東宮有西宮則是一正寢二小寢也○春秋

僖公二十年西宮災公羊傳曰西宮者小寢也有西宮則有東宮矣魯子曰以有西宮亦知諸侯之有三宮也

案公羊以西宮爲小寢引魯子云諸侯有三宮是以

中宮爲正寢東宮西宮皆小寢也何休注云右媵居西宮左媵居東宮失傳意矣然公羊以此西宮爲小寢亦

恐未確杜預注左氏云西宮公別宮也不用公羊說孔

謂杜注取公羊爲說非是考左傳襄公九年穆姜薨於東宮此夫人

別宮稱爲東宮者也左氏記鄭之亂云晨攻執政於西

宮之朝襄西宮有朝而執政在焉此公之別宮稱爲西

宮者也

杜預之說蓋取諸此

左傳又曰叔鄭伯以如北宮北宮亦

別宮也然則公羊以西宮爲小寢何休以東宮西宮爲左右媵所居皆非定論矣

世婦諸嬪御之寢及在內諸官府宮室今未能詳指其處姑仍舊圖而略考之天宮內宰上春詔王居帥六宮之人而生種稷之種鄭注云六宮之人夫人以下分居后之六宮每宮九嬪一人世婦三人女御九人其餘九嬪三人世婦九人女御二十七人從后唯其所燕息焉此說非也夫人以下各有職事六宮之人當是分掌六

宮之事者蓋王后六宮如王之六寢其正寢不齊不寢其室非嬪御所得居也考工記曰內有九室九嬪居之九嬪不分居后之六宮明矣九嬪旣不得居世婦女御更可知已然則嬪御各自有寢諸侯亦然圖考於嬪御世婦別爲寢是也

宮正之職曰以時比宮中之官府次舍之眾寡注曰官府之在宮中者若膳夫玉府內宰內史之屬陳氏汲曰典婦功典絲枲染人屨人等官各有官廬官署在宮中內宰之職曰掌書版圖之灋以治王內之政令均其稍

食分其人民而居之注曰版謂宮中閭寺之屬及其子弟錄籍也圖宮中官府之形象也人民吏子弟

次舍宮中宿衛之處也內宰曰憲禁令於王之北宮而糾其守注曰北宮后之六宮守宿衛者疏曰若宮伯所掌士庶子宮伯職曰掌王宮之士庶子凡在版者授八次八舍之職事注曰衛王宮者必居四角四中於徼候便也次其宿衛所在舍其休沐之處鄭司農云在內爲次在外爲舍案宮正注云次諸吏直宿舍其所居寺彼謂諸吏宮伯注謂衛王宮者然則宮中次舍多矣先

鄭後鄭皆謂次與舍不同處又不但在四角也圖考但於四角爲次舍略備其規模云爾

宮隅若今角樓也考工記匠人宮隅之制七雉詳後雉門兩觀圖

庭詩案三禮義宗天子宫方一千二百步三分二爲路寢之前一爲路寢之後自皋門至路門凡五門相去之數未聞路寢之前至皋門凡五門之間合九百步爲三朝皆方百步諸侯三門皋門當云庫門至路寢相去六百步自路寢以前爲三朝各百步引見玉海卷七十朝之脩

廣門之遠近圖考未之及故錄出之其言三朝皆方百步本考工記市朝一夫而言也據崔氏此說是天子宮方四里諸侯宮方三里

漸鴻案古者三百步爲一里橫一步縱百步爲畝縱橫皆百步爲一夫百畝之地考工記匠人市朝一夫鄭注曰方各百步是也三禮義宗言諸侯之宮自路寢以前六百步加以三分之一在路寢之後爲九百步此據上公言之也周禮典命注曰公宮方九百步侯伯宮方七百步子男宮方五百步是方九百步者上公之宮也魯爲

侯爵而用公禮其宮亦當方九百步

王制小學在公宮南之左此圖無小學曲禮君子將營
宮室宗廟爲先廡庫爲次此圖無廡皆未備也宜考補

諸侯五廟圖

E

問門

寢

左昭廟

王敦

門

閩門

寢

左昭廟

〔補註〕

門

關門

寢

太祖廟
不遷百世

不百世

廣學

門

閨門

寢

右穆廟

**下
熟**

門

問答

寢

右穆廟

五、**熟**

門

屏疎廟魯

社 事

案朱子中庸或問用孫毓說謂廟皆南向太祖在北左昭右穆以次而南李如圭作儀禮釋宮曾與朱子往復商訂引聘禮賈疏太祖居中二昭居東二穆居西而曰其說當考今考僖公二十年西宮災穀梁傳云閔宮也穀梁赤魯人穀梁序疏曰穀梁子名假字元始魯人一名赤受經於子夏作傳傳孫卿魯廟猶親見之以爲閔公爲穆當僖公時其廟宜最在西故以西宮爲閔宮也
文公二年大事於太廟何休注以閔僖爲穆考周公爲文之昭以世次推之伯禽至閔公十七君十一世是閔公爲穆也若如孫毓說左昭右穆以次而南則桓宮閔宮同在西不得專稱閔宮爲西宮矣公羊以西

宮爲小寢穀梁以爲閔宮先儒多從公羊以圖考諸侯穀梁爲誤然因其致誤之由可見宗廟之制

五廟圖從賈疏今仍之

諸侯五廟曰考廟

禘

曰王考廟

祖

曰皇考廟

曾

曰顯考

廟高祖曰太祖廟

始封之祖

圖考於左昭廟稱爲高祖廟祖父

廟右穆廟稱爲曾祖廟禘廟此在初立五廟時又必始

祖爲穆者其位次如此既有升祔有遷祧則不必然矣

朱子曰宗廟之中但以左右爲昭穆不以昭穆爲尊卑

今依朱子昭穆之左右有定高曾祖禘之左右無定蓋

新主之入廟各以其班班在昭則入左昭之祖廟祖主

升於昭之高祖廟高祖主升於太廟曰祧則禰廟曾祖廟皆在東矣右穆不動而稱爲高祖廟祖廟矣班在穆則入右穆之祖廟左昭不動亦然故今圖不用顯考皇考高曾祖禰等稱但曰左昭廟右穆廟云

月令寢廟畢備鄭注曰凡廟前曰廟後曰寢孔疏曰廟是接神之處故在前寢是藏衣冠之所故在後爾雅釋宮曰室有東西廂曰廟無東西廂有室曰寢 案廟皆有寢廟擬正寢寢擬燕寢也圖考有廟無寢今補

聘禮記曰賓請觀於宗廟訝率之自下門入 案宗廟

有正門有下門下門偏隅之門如今便門也 其內與
宮中相通者曰闈門婦人入廟所由之門也士冠禮降
自西階適東壁北面見于母注曰出闈門圖考據此謂
闈門在東壁東出今案廟在宮寢之東則廟中之闈門
不當在東壁東出經云適東壁北面見于母不言出是
母已在廟中東壁內矣鄭以適東壁爲出闈門誤也孔
穎軒廟寢異制圖說闈門在北壁與北階相對其說較
勝但廟之後有寢闈門當在寢後東北北出也各廟皆
有之 士虞禮主婦亦拜賓注曰闈門如今東西掖門

案士虞禮是在殯宮主婦拜女賓於闔門之內彼闔門在寢門外喪大記曰其無女主則男主拜女賓於寢門外可證也若婦人入廟則更有由宮寢通廟寢之闔門其出宮之闔門當在宮寢之東東出其入廟之闔門在廟寢之後北出

春官天府職曰掌祖廟之守藏凡國之玉鎮大寶器藏焉凡官府鄉州及都鄙之治中

簿書之要

受而藏之民數穀

數受而藏之 案天子祖廟有內府又有天府諸侯有


內府其天府於經不見然諸侯之宗器亦當藏於祖廟

若魯之崇鼎貫鼎大璜封父龜越棘大弓垂之和鐘叔之離磬女媧之笙簧

春秋穀梁傳曰亳社以爲廟屏 案諸侯廟門外以亳社爲屏不更立屏牆天子廟門外則有疏屏明堂位魯廟疏屏天子之廟飾也是魯禮之僭然合亳社以爲廟屏觀之可證屏在廟門外觀禮侯氏出自屏南適門西先言出然後自屏南適門西是天子疏屏在廟門外也魯僭天子疏屏亦在廟門外矣金誠齋讀侯氏出自屏南爲句謂天子宗廟宮寢皆內屏若爾則凡出門未有

不自屏南者觀禮此句眞爲贅語矣金氏又謂天子外
屏說出緯書不足信今案天子外屏已見荀子大略篇
金誠齋說經大半駁雜不足引因其
好與江君圖考爲難故引而正之

庫門外朝及雉門兩觀圖



案諸侯三門曰庫門曰雉門曰路門

路門亦曰寢門亦曰虎門天子路門

亦曰庫門即大門公宮之外門也庫門之外為外朝天

畢門子諸侯皆然覲禮曰諸侯前朝皆受舍于朝又曰乘墨

車乃朝是天子外朝在庫門之外也

曲禮客車不入大門故知乘墨車乃

朝是在庫門外也鄭康成謂受舍於朝是在聘禮賓皮

文王廟門之外誤有辨見儀禮條辨本條下弁聘至于朝賓入于次鄭注曰次在大門外之西又賓

拜饗餼于朝注曰拜於大門外又賓死介復命柩止于

門外注曰門外大門外也以柩造朝是鄭注聘禮知外

朝在庫門外甚明周禮小司寇注偶然一誤

小司寇注謂外朝在

雉門外

後儒遂信其所誤棄其所不誤過矣圖考已有辨

今復證明之

又案外朝在庫門之外外朝之南卽城

之南門其間有東西通衢天子外朝之南有皋門皋門與庫門之間亦有東西通衢故平時臣民皆得往來旣入庫門則有宮牆環之惟每歲正月之吉縣灋觀象之時萬民得入而觀焉挾旬斂藏則不得入矣周禮朝士掌外朝之灋左嘉石平疲民焉右肺石達窮民焉疲民窮民得坐於嘉石肺石外朝不在庫門內此亦確證朝士又曰凡得獲貨賄人民六畜者委于朝注曰待來識

之者圖考亦引此以證外朝在庫門外金誠齋駁易圖考謂外朝在庫門內可無散失今案庫門內萬民不得入安有來者識之邪庫門外自有朝士之屬守之何慮散失

天子外朝有三槐九棘諸侯無之國語鉏麇觸廷之槐而死韋昭注云諸侯之朝三槐三卿位焉今案諸侯外朝容或有槐謂三槐三卿位焉此恐韋氏之臆說圖考云諸侯之外朝未必有三槐九棘嘉石肺石是也

或謂天子諸侯皆三門天子三門皋應路諸侯三門庫

雉路今案郊特牲卜之日王立於澤下云庫門之內戒百官是天子有庫門矣考究其實鎬京因諸侯之舊止有皋應路三門周公營洛乃備天子之制爲五門矣

詩斯

干正義曰周公制禮以洛邑爲正都其天子之制皆在王城爲之

或又謂諸侯之庫門

卽城門而以雉門爲大門其說尤無據戴東原謂朝止有三若天子五門則其二門虛設無用今案皋門之內爲外朝庫門之內爲府庫又北爲象魏雉門之內左爲宗廟右爲社稷應門之內爲治朝左右有卿大夫治事之室又有師氏保氏教國子之學路門之內爲燕朝非

五門不足以成體制何嘗有虛設之門

雉門有臺學者皆知之庫門有臺見周書作雉解曰庫臺禮器天子諸侯臺門未嘗專指爲雉門也學者習知雉門有臺遂指禮器之臺門爲雉門耳門之有臺取其可以望遠亦以資守衛不必皆有兩觀也崔豹古今注云古每門樹兩觀所以標表宮門亦非 庫門雉門有臺路門無臺也路門之內外左右皆有塾當中有門雷足知路門無臺矣天子蓋皋庫雉有臺應路皆無臺周書先言應門後言庫臺足知應門無臺矣孔晁周書注

云門皆有臺非也

周書但言應門庫臺不及他門者據明堂與廟寢同制者言之也明堂但

有應門

左傳屨及於室皇之外注云室皇寢門闕豈楚

之寢門亦作闕觀與然非制也

諸侯之雉門亦謂之

中門周禮司儀出及中門之外是也亦謂之闕門穀梁

傳諸母兄弟不出闕門是也諸侯有闕見於經傳者甚

多禮運疏謂諸侯不得有闕

周禮天官疏引公羊以兩觀爲僭恐非春秋公羊傳

子家駒曰諸侯僭於天子大夫僭於諸侯久矣昭公曰吾何僭矣哉子家駒曰設兩觀乘大路皆天子之禮也

注曰禮天子諸侯臺門天子外闕兩觀諸侯內闕一觀圖考引此自注曰按疏以爲禮說又不足爲據又曰兩

觀與臺門當異制莊二十一年鄭伯享王於闕西辟樂備是有兩觀則東西有兩宮室可設享而舞樂不止於

門上作臺也設兩觀
爲僭或當如公羊說

大戴禮保傅篇云太子過闕則

下劉向列女傳云衛靈公與夫人夜坐聞有車聲麟麟
至闕而止過闕復有聲竊嘗疑闕門之外不容有臣子
之車東西往來蓋漢人之言以闕爲君門之通稱車過
大門外卽謂之過闕也侯伯之宮七百步以其三之一
爲燕寢大門外車聲麟麟燕寢夜坐亦能聞之矣曲禮
大夫士下公門謂大門也豈待過雉門而後下車哉若
近儒之說平時萬民皆得入大門往來又謂天子三門
大門之內亦容平民往來是天子諸侯日日視朝之地

與民之往來者止隔一門成何禮體且大門之外已有東西通衢大門之內又有通衢乎

闕門者謂中央闕然通道也其兩邊之臺名曰象魏亦曰兩觀注家皆云兩觀闕也似失名闕之義爾雅釋宮觀謂之闕謂兩觀之中央謂之闕也郭璞云宮門雙闕非是雙闕者後代之稱也明堂位疏引古詩雙闕百餘尺謂闕在門兩旁不得當道今案古詩所云仍是漢人稱兩旁之臺爲闕非古義也水經伊闕注曰昔大禹疏以通水兩山相對望之若闕韋應物詩鑿山導伊流中

斷若天闕是皆指中央空處爲闕陳祥道禮書曰謂之闕以其闕中也毛西河春秋傳曰天子諸侯以臺爲門築土爲兩臺而架屋其閒又謂之闕包季懷

世榮

毛詩

禮徵曰門之兩旁築閭爲基起屋於上曰觀兩觀並峙中央缺然故又曰闕此皆闕字正解周禮大宰注引鄭眾云闕在門兩旁中央闕然爲道劉熙釋名亦云闕在門兩旁中央闕然爲道不知中央闕然故名爲闕其兩旁之臺魏然而高者不得名闕也孔氏春秋疏云觀與象魏闕一物而三名未之審也左氏莊二十一年傳

鄭伯享王於闕西辟疏曰其上懸灋象巍巍高大謂之象魏使人觀之謂之觀 案此疏是也兩旁之臺魏然而高故謂之魏以其懸象故謂之象魏以其觀示萬民故謂之觀觀讀去聲示也 惠仲孺禮說曰象魏於卦爲觀下體坤爲民上體巽爲命互體艮爲闕命懸於闕萬民觀焉兩觀之名蓋取於此 案此解觀字最精確觀卦又爲積畫艮三三卽不取互體亦有闕觀之象周禮大宰懸治象之灋司徒懸教象之灋司馬懸政象之灋司寇懸刑象之灋皆於兩觀司空事象亦當懸之然

冬官闕矣不可得而知也惟宗伯之禮象不懸治象教
象政象刑象皆有兩一爲邦國都鄙之灋萬民所觀州
黨族閭所讀者是也一爲官府之灋小宰小司徒小司
馬小司寇帥其屬而觀者是也圖考謂象魏卽月朔誤
說在吉
月考

春秋定公二年雉門及兩觀災 案雉門及

兩觀之上皆有屋故能災兩觀之屋卽所以藏象魏也
守訓案說文徐鍇云爲二臺於門外作樓觀於上上員
下方以其闕然爲道謂之闕以其上可遠觀謂之觀戴
氏六書故云宮城爲樓觀闕其下爲門所謂闕門也此

皆可補闕字之義左傳僖五年公既視朔遂登觀臺以望杜注觀臺之上有屋可以遠觀者也此可知觀上有屋

漸鴻案明堂位庫門天子皋門雉門天子應門謂其高

廣之數如之也聘禮注疏引考工記應門二徹參个古徹

通謂諸侯之庫門闊二丈四尺每轍之闊八尺是庫門雉門其

高廣相似矣考工記又曰輪人爲蓋蓋已崇是難爲門

也是故蓋崇十尺案蓋建於車上車軫至地四尺車蓋

至軫十尺合之十四尺車出入乎門則門之高可知

考工記王宮門阿之制五雉宮隅之制七雉城隅之制九雉又門阿之制以爲都城之制宮隅之制以爲諸侯之城制鄭注曰宮隅城隅角桴思也雉長三丈高一丈諸侯城隅高七丈宮隅門阿高五丈禮器天子諸侯臺門賈疏桴思小樓也阿謂門屋之脊案鄭言諸侯門

阿高五丈引禮器天子諸侯臺門謂此門阿卽臺門也

賈疏謂阿門屋之脊則知諸侯臺門之制自地至屋之

脊高五丈其東西廣十五丈也

孔奭軒大戴禮補注云古者五板爲堵板長八


尺高二尺春秋公羊說五堵爲雉此度長之雉也古周禮及左氏說三堵爲雉此度高之雉也堵高一丈長四

丈雉高三丈長二十丈 案孔氏此說非也若如其說則諸侯臺門高十五丈長一百丈必無是理許慎五經異義引古周禮及左氏說一丈爲板板廣二尺五板爲堵一堵之牆長丈高丈說與鄭合孔氏謂雉高三丈長二十丈乃何休說也誤

治

朝

圖



案門之有屏所以蔽內外也荀子大略篇曰天子外屏諸侯內屏禮也爾雅釋宮屏謂之樹郭注曰小牆當門中孔氏曲禮疏曰天子外屏屏在路門之外諸侯內屏屏在路門之內禮記明堂位疏屏鄭注曰屏謂之樹今桴思也刻之爲雲氣蟲獸孔疏曰漢時謂屏爲桴思桴思小樓也城隅闕上皆有之然則屏上亦爲屋以覆屏故稱曰桴思案城隅與闕上之小樓名桴思疏屏亦名桴思異物同名非於屏牆之上起小樓也孔氏以小樓名桴思釋屏牆之名桴思恐失之矣漢書五行志

未央宮東闕采思災顏師古注云采思闕之屏也彼當

爲闕上之小樓師古以爲闕之屏亦非也

王懷祖廣雅疏證曰采思

或作采思或作桴思或作浮思或作覆思水經注太平御覽引廣雅並作復思鹽鐵論祠堂屏

闕垣闕采思高誘注曰采浮也思絲也謂織絲之文輕

疎浮虛之貌蓋宮殿簷戶之間也此又別是一義與闕

屏無涉鄭解疏屏之疏爲刻則此屏刻木爲之演繁露

曰采思云者刻鏤物象著之板上取其疏通連綴之狀

而采思然故曰采思也以此刻鏤施於廟屏則爲疏屏

施於宮禁之門

謂門闕上

則爲某門采思而在屏則曰某屏

采思此解采思較明徹然竊謂凡屏不皆有刻鏤也惟廟屏刻之故別名疏屏今之廟門外牆以甃嵌空十字紋正中亦有刻鏤者卽疏屏之遺意與若城隅闕上之小樓古於高處起屋卽謂之樓非作兩重屋別有辨至漢時則亦刻鏤采思然故名采思若公門之屏則取屏蔽爲義古者但爲牆而已郭璞謂小牆當門中是也古無刻鏤之制亦無采思之名至漢時則亦合板刻鏤施諸屏上故亦名采思鄭注明堂位曰今桴思可知古不名桴思崔豹古今注曰采思屏之遺象也可知漢時之采思不全象古時之屏

劉熙釋名曰屏自障屏也此釋古人名屏之義又曰杲
恩杲復也恩思也臣將入請事於此復重思之也崔豹
古今注亦曰臣來朝君行至門內屏外復應思惟杲恩
覆思也此因漢時之屏名杲恩而釋其義如此皆不於
小樓上取義卽鄭君以桴思爲刻鏤亦不於小樓取義
孔冲遠牽合小樓名杲恩遂有屏上爲屋之說非古制
也然尋孔氏之意不過如今人內門之內作屏門上有
屋蓋耳陳祥道惑於小樓之說其屏圖乃作高臺上起
樓屋愈失之矣

天子諸侯皆於路門設屏非每門有屏也陳祥道謂古者門皆有屏謂郊特牲旅樹是外門之屏曲禮天子當之而立是路門之屏國語吳王背屏而立是寢門之屏今案路門卽寢門一也旅樹者旅道也謂門道也郊特牲疏謂人君當門道立是亦路門也陳氏分而爲三誤屏設於路門天子外屏在路門外諸侯內屏在路門內蓋路門之內爲人君之路寢而路門之外爲諸臣治事之室故設屏於路門以蔽內外所以蔽路寢也孔氏謂天子外屏在路門之外而近應門圖考謂天子屏在應

門外諸侯屏在雉門內不以蔽路寢而以蔽正朝乎其
誤顯然劉熙釋采恩謂臣將入請事於此復重思之若
天子屏在應門諸侯屏在雉門則諸臣由治事之處入
路門不過此屏何取於復思之義

國語吳語王乃入命夫人王背屏而立夫人向屏

此在路寢

庭之又曰王遂出夫人送王不出屏諸侯屏在路門內此

確證也大戴禮武王踐阼三日召師尙父師尙父端冕

奉書而入負屏而立王下堂南面而立

惟路門之內乃有堂此亦在路

寢之是時武王已卽天子位屏宜在路門外乃師尙父

入負屏既入而後負屏與吳語王入背屏同是屏亦在
路門內蓋踐阼之初因舊制而未之改也鄭志云鎬京
宮室因諸侯之舊更不改作

鴻恩案管子中匡篇云公與管仲父而將飲之酒管仲
至公執爵夫人執尊觴三行管仲趨出公怒鮑叔隰朋
趨而出及管仲於途曰公怒管仲反入倍屏而立公不
與言少進中庭公不與言少進傅堂是屏北爲中庭中
庭北爲堂尤爲屏在路門內之確證

爾雅門屏之間謂之闕案天子之在門外屏內諸侯

立於門內屏外皆爲門屏之間謂之立者取立以待之義也劉熙釋名曰立也爾雅釋詁曰立久也說文解字曰立久立也儀禮聘禮賓朝服問卿及廟門大夫揖入鄭注曰省內事既省俟於立

大夫無屏以門內兩塾間爲立爲俟賓客

之字又通著詩齊風俟我于著乎而毛傳曰門屏之間謂之著是皆以立待爲義郭璞爾雅注人君視朝所立處謂視朝時先立於立以俟羣臣皆立定然後出視朝非謂立卽視朝之位也曲禮天子當立而立孔疏曰天子受朝於路門外之朝於門外而立

門外以待屏內

諸侯之至故曰當_二而立也邵二雲爾雅正義曰天子
外屏在路門之外門以外屏以內其閒謂之_二諸侯未
集天子_二立於此諸侯既集則出屏外負屏而立曲禮
以負屏爲當_二猶以負依爲當依也 案孔說當_二而
立是在屏內將出視朝之時邵說當_二而立是在屏外
正朝之時二說不同以當依證之邵說爲優然皆以_二
爲立待不謂_二卽視朝之位諸侯視朝亦先立於_二以
待羣臣雖羣臣先入人君亦至_二處稍立整威儀俟羣
臣皆肅整然後出路門立於視朝之位以視朝其禮節

自當如此圖考誤以_二爲視朝之位遂誤謂天子屏在
應門外諸侯屏在雉門內矣金誠齋駁曲禮疏及邵二
雲爾雅正義謂君無待臣之理亦不識_二字况康王之
誥先言諸侯出廟門侯侯王之出也王出在應門之內
然後大保率西方諸侯入應門左畢公率東方諸侯入
應門右君先出臣後入有明徵矣喪禮無威儀故不必
立於_二而直出在應門之內應門內卽路門外若平時常朝則
必先立於_二侯羣臣立定乃出也金氏又引左傳朝有
著位及國語日恪位著謂_二兼君臣而言今案爾雅中

庭之左右謂之位彼言羣臣之著位也門屏之間謂之
立此專指君立處也爾雅本自分明豈可混而同之乎
過位包氏鄉黨注曰過君之空位此謂路門外君日日
視朝之位也邢疏以門屏之間人君立之處釋之豈
有過君位而不改容至立而後色勃足躩乎蓋邢誤以
立卽視朝之位然則人君視朝不出路門乎此亦因誤
解爾雅門屏之間謂之立以爲屏在雉門內故其誤至
此獨不思屏若在雉門內則由雉門至路門相去百步
爾雅所謂門屏之間謂之立者不太寬乎


爾雅門側之堂謂之塾郭注夾門堂也 案廟之正門
與人君之路寢門大夫士之廟門寢門皆有左右塾旣
曰夾門堂則與門相連圖考塾去門太遠今改正 門
側之堂亦曰門堂考工記匠人門堂三之二鄭注曰門
堂門側之堂

諸侯治朝之位於經不見注疏以燕朝之位推之如此
圖考從之 孫敬軒禮記集解曰於司士射人見天子
治朝之位而諸侯則無文由天子治朝以推諸侯君視
治朝出路門外少左以北面而對君者爲尊天子之北

面者爲三公而孤東面大夫西面士西方東面則諸侯
之北面者爲三卿而大夫西面士西方東面也 案鄭
君以諸侯燕朝之位推知諸侯治朝之位孫氏以天子
治朝之位推知諸侯治朝之位二說不同皆無確證今
考周禮射人與司士兩職天子治朝之位與燕朝同則
諸侯治朝之位亦當與燕朝同鄭說似較長今仍江氏
舊圖而孫氏說亦並錄之以俟考

圖

隨東



卿始入立於大夫之東君揖之立於此

[illegible]

士不待君
揖入門卽
立於此

碑

屏

蘇 風

案路寢之堂略見書顧命有堂有序有夾有房有東堂
西堂有兩階有側階圖考依此圖之得其概矣爾雅釋
宮曰牖戶之間謂之展儀禮釋宮曰戶東而牖西戶牖
之間謂之展圖考牖居中而無展蓋坊刻失之今補

舊說人君之堂左右房大夫士無右房包季懷毛詩禮
徵自注曰張氏惠言云房之與室其制當有別今西房
之圖迥異東房而與室不殊案

原案

禮有房俎鄭注上下

有兩閒有似堂房蓋凡房之制皆爲兩閒而無北壁有
北壁卽謂之室大夫士西房爲室制有北壁故不得房

名案大夫士右房稱室此說最好可息千古東房西室之訟矣詩大田旣方旣早鄭箋曰方房也孕甲始生而未合時也以未合爲房可以見房之制矣無北壁爲房壁四周爲室天子諸侯東房西房皆無北壁大夫士東房無北壁西室壁四周故尙書大傳曰大夫士東房西室蓋東房西室仍有中央正室喪大記諸侯之禮婦人髻帶麻於房中鄭注曰西房是也大夫士西房稱室故士喪禮男子髻髮在房婦人髻于室此卽東房西室之明證

士喪禮賈疏云大夫士無西房故於室不知此正是西房稱室若正室則尸在焉婦人髻當於

隱處豈可在
舅姑尸側

又徵之鄉飲酒禮賓席牖前南鄉三賓之
席繼而西皆南鄉若無西房則賓席牖前已是堂上西
北三賓之席無地以容矣 大夫士西室亦有時稱房
聘禮賓退負右房此在大夫之堂亦稱右房以其當右
房之處由堂上視之制度相同也說者拘於大夫士無
右房謂彼右房是自外而內以東爲右今詳經文賓升
自西階南面受圭退負右房而立則是西房甚明

大夫士東房西室而經傳所見東房爲詳西室則略今
考之居寢之西室唯見於士喪禮婦人髮於室一節其

廟中之西室蓋所以爲客館也聘禮記卿館於大夫大夫館於士注云館者必於廟今案廟之正室爲神之所依不可爲客館其爲館當在西室矣觀聘禮還圭之節是在西室顯然古人以西方爲賓位故以西室爲客館尙書大傳天子諸侯東房西房北堂有北堂則必有北階書顧命曰一人冕執銳立于側階鄭注以爲東下階某傳以爲北下階孔疏據經文東堂西堂皆已有人不應此人復立東下階上則以爲北下階者是也側猶特也冕執銳者止一人是北下唯有一階故曰側階然則

人君雖有左右房亦唯東房有一北堂西房既無北階則不名北堂也毛詩禮徵謂人君東房西房皆有北堂恐誤又謂夾室與東西堂相連爲之無南壁亦誤室之所以異於房者以其壁四周也夾室若無南壁何以謂之室又謂堂上東西序與階相值亦非

蔡仁錫

德晉

曰以室五閒分言其名則中間爲室左右

兩閒爲房又左右兩閒爲夾室 案蔡氏此說五禮通

考從之非也若如其說則中室太狹左右房與北堂亦太促皆不可以行禮卽以正室言之士喪禮尸牀在南

牖下脯醢酒醴奠于尸東主人坐于牀東眾主人在其
後皆西面婦人俠牀東面又有大功以上父兄姑姊妹
子姓在室亦男子西面婦人東面又庶兄弟祔使人將
命于室委衣于尸東牀上若室之東西止一閒之地不
足以容之矣俞蔭甫樾則謂棟以南爲堂棟以北爲室
若然則室之形東西狹而南北長不成體制而堂之南
北則太促屋當棟處其上曰阿士昏禮當阿致命不成
半身入壁乎蓋堂皆五架中一架爲棟棟之外爲楣楹
之外爲殿室在後楣之北注疏之說不可破也以東西

鄉黨圖考卷之三
言之則前堂五間三間在兩序之內二間在兩序之外
後室則以五爲三中爲正室兩旁爲左右房其夾室則
在房之南而直房之半耳特牲饋食禮豆籩鉶在東房
鄭注曰房中之東當夾北是夾在房南直房之半也以
士喪禮及特牲少牢二禮考之東房之陳設與其禮節
亦非一閒之地所能容也惟東西夾室所以藏物則一
閒之地不爲狹矣

洪氏 頤煊

禮經宮室答問曰房南面止一戶居中 案

房南面中直房之半爲序序之外爲夾戶若當房之中

則序外之夾與堂東西太狹矣今以東房言之士昏禮
尊于房戶之東房戶東尚可容設尊之地愈知房戶不
得居中當在序內近序除設尊之地卽爲房戶儀禮釋
宮曰房中之東其南爲夾洗直房戶而在房東西之中
則房戶在房南壁之東偏可見堂與室尺度之數經無
明文考工記匠人度九尺之筵東西九筵南北七筵堂
崇一筵五室凡室二筵此周人明堂之制外四面爲四
堂五室居中地已逼仄故每室只得二筵之地二筵十
八尺六尺爲步只得三步

六尺爲步見聘禮卿爲上擯注疏說

明堂爲天

子布政之宮其五室爲天子聽朔之後退入居息而已

說詳明堂禮制考

故每室二筵可矣路寢則吉凶諸禮皆行於

房室之內三步之地不能容也鄭謂路寢與明堂同制非是匠人又曰市朝一夫鄭注曰方各百步三禮義宗曰諸侯自路寢以前爲三朝各百步是燕朝之庭方百步也李如圭儀禮釋宮曰堂下至門謂之庭三分庭一在北設碑賈氏釋士昏禮碑在堂下三分庭一在北又曰聘禮注設碑近如堂深堂深謂從堂廉至堂室之壁三分庭一在北設碑而碑如堂深則庭蓋三堂之深也

又鄉射之侯去堂三十丈大射之侯去堂五十四丈則庭之深可知案此釋似可據諸侯大射之侯去堂五十四丈其南當仍有數步之隙地以六尺爲步計之與考工記市朝一夫鄭注方各百步合堂深自堂廉至堂室之壁當言自南霤至北霤蓋前堂及北堂皆無壁其承霤不得在堂上天子納陛其承霤在階下諸侯不得納陛其承霤宜在階上矣然則堂室之制得庭深三之一堂五架共得三十三步有奇四分之由後檐以南得十六步有奇由後檐以北得八步有奇去前後壁與屋檐

則室內之大小可知而房與北堂亦可知已

堂之左右有東西箱卽東西堂郭璞曰夾室前堂謂夾室之前其堂名曰東西箱也路寢與廟皆有之書顧命有立于東堂立于西堂卽路寢之東西箱在夾室之前者也公食大夫禮公揖退于箱鄭注曰箱東夾之前相期待事之處此廟中之堂亦有東西箱也前漢周昌傳上欲以戚姬子如意爲太子昌曰臣期期知其不可上欣然笑卽罷呂后側耳於東箱聽則箱在堂上序外明矣有謂東西堂下之南別爲小屋東西相鄉若今之軒

者誤公食禮兩云公揖退于箱而皆不云公降則箱不

在堂下可知

箱邊箱也字一作相俗作廂

胡竹邨燕寢考曰路寢之制左右房室在中南鄉開戶以達於堂而房與室無戶以相通 案左傳襄二十五

年公問崔子遂從姜氏姜入於室與崔子自側戶出公拊楹而歌是時崔子雖僞疾疑當行君視臣疾之禮移於正室室有側戶而可出公在堂上而不知是側戶通於東房由東房出北堂而去矣但儀禮昏燕喪祭諸禮節皆不見側戶特牲饋食禮賓三獻主婦出反于房旣

出而後反于房是無側戶矣胡氏引左傳姜氏事謂彼是在燕寢其或然與儀禮釋宮引詩斯干西南其戶江慎修亦謂是燕寢謂東房之西南隅開戶以入室南戶者室與堂相通西戶者左房與室相通孔塹軒廟寢圖說云廟室寢室皆有側戶金誠齋云東房有西鄉之戶燕寢考云斯干築室百堵西南其戶箋云此築燕寢也天子之寢有左右房西其戶者異於一房者之室戶也今由其說申之云異於一房之室戶也者謂諸侯大夫士燕寢一房室在西室則東向開戶以達於房房則南

向開戶以達於堂由堂入房由房入室而室之南無戶
戶東牖西戶牖之扉皆一扇戶啟則扉東掩於窻牖啟
則扉西掩於奧尊者居奧今謂之居牖下也古與戶二
字皆象形雙扇爲門單扇爲戶又在牆爲門在室爲戶
東西夾室舊圖無戶今據聘禮歸饗設豆於東夾西夾
皆西北上知東西夾室之戶皆在東南書顧命於西堂
上布席曰西夾南鄉彼在西夾之前居中布席則西夾
之戶近東可知蓋南鄉近東開戶古者宮室之恒制也
詩斯干西南其戶彼燕居之室故或有西其戶者其夾

北與房相通之處亦當有戶洪氏禮經宮室答問曰由夾室以達於房由房以達於堂與室是也內則天子之閣左達五右達五公侯伯於房中五大夫於閣三鄭注曰達夾室五者三牲之肉及魚腊也孔疏曰天子尊庖廚遠故左夾室五閣右夾室五閣諸侯卑庖廚宜稍近故於房中減降於天子唯在一房之中而五閣也大夫既卑無嫌亦於夾室而閣三也三者豕魚腊也據此亦可見夾室與房相通又儀禮大射儀薦脯醢自右房公食大夫禮筵出自東房又鄉飲酒禮記薦自左房少牢

饋食禮主婦薦自東房又鄉飲鄉射之籩豆脯醢特牲少牢之豆籩鉶菹醢醢蕡脰脩脯醢棗糗之等皆出自東房此等諸物必自夾室治之由房以出諸侯雖於房中爲五閤然房中之爲地無多其內爲夫人及贊者及外內命婦行禮之所在其籩豆鉶器諸品又較大夫士而有加則必與夾室相通而後能容之故洪氏謂夾與房有相通之戶是可信也但洪氏說未暢今爲申明之以聘禮設豆於東夾西夾皆西北上知其通房之戶皆在東北

李謐明堂制度論引鄭氏三禮圖曰展縱廣八尺畫斧紋於其上 案堂上之展天子諸侯及卿大夫士皆有之人君之展畫斧紋臣下無斧紋也此展不常設有事乃設之書顧命狄設黼展儀禮覲禮天子設斧依於戶牖之間周禮司几筵凡大朝覲大饗射凡封國命諸侯王位設黼依黼展黼依斧依並同特言設則不常設可知 司几筵鄭注斧謂之黼其繡白黑采以絳帛爲質制如屏風賈疏曰依狀如屏風長八尺屏風之名出於漢世 案玉海九十一屏障注引春秋後語云孟嘗君屏風後常

有侍史記客語則漢以前已有屏風之名三禮圖言畫斧紋司几筵注言繡兩處互異疑繡是漢制

堂上南鄉之位曰戶西曰牖前曰戶牖閒位各不同各有所宜注疏混而一之指戶西之位牖前之位皆爲戶牖閒而概指爲賓客之位今考之戶牖閒南鄉人主之尊位非賓位也顧命牖閒南鄉傳謂見羣臣覲諸侯之坐此卽戶牖之間司几筵王位設黼依依前南鄉是也或謂人君無正中而南鄉者引古之君子行不中道立不中門坐不中席爲證不知曲禮此言人子之節耳人子之不敢居所以避尊也或又以牖閒爲兩牖閒以諸戶牖閒爲一戶兩牖之間謂路寢之制如明堂尤非諸

侯之堂亦以戶牖閒爲見羣臣之坐檀弓夢坐奠於兩楹之間鄭注曰兩楹之間南面鄉明人君聽治正坐之處疏曰每日視朝雖在路門外退坐當路寢兩楹也諸侯視朝亦南面知者諸侯一國之尊今案兩楹閒南面卽牖閒負斧依之位燕禮君席於阼階西面者彼爲賓主禮若君臣禮則牖閒南鄉也其賓位則曰戶西曰牖前皆不在戶牖之間矣蓋尊客則在牖前司几筵諸侯筵國賓於牖前是也國賓謂諸侯來朝者也鄭注謂兼卿大夫來聘非是卿大夫來聘筵於戶西設蒲筵緇布純加莞席元帛純見儀禮此經云筵國賓於牖前設莞筵紛純加

縑席畫純明不兼卿大夫來聘矣又聘禮注引司几筵謂是筵孤亦非若以牖前爲戶牖

閒則是主君負屨聽治之位設筵以待國賓賓居主位可乎其尋常之賓則在戶西燕禮司宮筵賓于戶西大射儀司宮設賓席于戶西燕禮大射皆以大夫爲賓若以戶西爲戶牖閒則是人君負屨聽治之位設筵以燕其臣臣居君位可乎公食大夫禮曰宰夫設筵不言戶西戶西可知也聘禮設依神之席但曰几筵旣設不言其處亦戶西也知者士昏禮自納采至親迎其依神之席皆設於戶西故知神席皆戶西也

神席西上右神席几與生人異神席

設於賓位戶西牖前皆賓位不於牖前而於戶西者牖前尊而遠戶西親而近也聘禮醴賓之節宰夫徹几改筵神席西上改筵東上仍在戶西故知公食大夫亦戶西也推之大夫士之堂亦以戶西爲賓位士冠禮醴子筵于戶西記曰醴于客位是戶西客位也士昏禮醴賓主人改筵東上此蒙上筵于戶西之文是亦戶西廟寢圖說曰戶西室外偏東而近戶賓席所在是也若鄉飲酒禮坐賓於西北則在牖前鄉飲之賓是士於主人爲降等而在牖前者賓而升之故尊之記曰主人者尊賓

故坐賓於西北是也

說又見宮室考

徧考禮經無筵賓於戶牖

閒者大戴禮諸侯遷廟禮云至於新廟筵於戶牖閒此是新死者入廟筵於戶牖閒示爲此廟之主戶牖閒是主位亦一證也公食大夫禮云若不親食使大夫致之盞實實于筐陳于楹內兩楹閒此是致食于賓館則賓爲主人益知兩楹閒是主位非賓位矣士昏禮醴婦席于戶牖閒此著代之義非客之也子之著代冠於阼階而醺之則於客位舅姑共饗婦婦降自阼階亦著代也

婦有代姑之義

而醴之不於客位男女之異也士虞禮曰佐食

出立于戶西而下記云佐食無事則出戶負屨南面彼當以經文爲正經言戶西則不正負屨當偏東近戶矣記言負屨無嫌者以其在士之堂士卑故無嫌若以人臣而在人君之堂不但負屨之位不可僭卽負屨之名亦不可假也圖考誤從注疏今詳辨之

堂之隅有坫爾雅坳謂之坫郭注曰在堂隅士冠禮曰待于西坫南士虞禮曰苴刈茅實于筐饌于西坫上是堂西南隅之坫也大射儀曰大師及少師上工皆東坫之東南旣夕記曰設楸于東堂下南順齊于坫是堂東

南隅之玷也其東北隅西北隅於經不見有玷惟明堂
四面皆同則四隅皆有玷圖考云堂之四隅卽爲玷非
別有土爲之誤

說詳宮
室考

堂塗謂之陳亦謂之唐詩陳風中唐有甃傳云甃瓴甌
也博雅甃甃也升堂之塗以甃石甃之周書作雒解太
廟宗宮考宮路寢明堂咸有隄唐孔晁注曰隄高爲之
也考工記匠人堂塗十有二分鄭注曰分其督旁之脩
以二分爲峻疏曰中央爲督假令兩旁上下尺二寸則
取二寸於中央爲峻取水兩向流也 案此疏恐誤堂

階每等高一尺堂塗若高尺二寸則沒其第一等階矣
記言十有二分不謂十有二寸蓋中央之峻高於兩旁
者十分之二未嘗言其尺寸之數令人以意得之 陳

碩甫

與

詩毛傳疏曰堂階之塗謂之堂塗詩謂之陳中

庭之塗謂之庭塗詩謂之唐

案爾雅廟中路謂之唐

堂塗謂之陳廟中路亦指堂階之塗而言陳氏祥道曰
唐與陳皆堂下至門之徑特廟堂異其名耳是也作雒
解宮廟路寢咸有隄唐則廟中寢中通謂之唐矣詩中
唐有甃毛傳曰中中庭也唐堂塗也是堂塗亦謂之唐

矣中庭猶言庭中非東西之正中也

中庭說詳上
攢相禮圖

唯明

堂九階有中階乃有中塗其他廟寢皆兩階既無中階
安得有中塗且中庭三分一在北有碑益知其無中塗
矣


鄉黨復其位大夫之位在中庭北面圖考已有辨何晏
引孔注云來時所過位以過位之位復其位之位合爲

一近時解經者遂多生異說

經義叢鈔載論語過位解
四篇言人人殊今皆不錄

今辨明屏在路門內亡在門屏之間君位在路門外大
夫位在中庭北面則過位復其位瞭然矣

大 夫 士 東 堂 圖



案人君之堂屋檐四注其東堂西堂卽在東西宇下矣
大夫士之堂謂之夏屋南北兩下而已其東西堂之制
度舊皆無圖馬氏駟儀禮易讀有堂室側圖橫列五柱
中一柱當棟旁兩柱當前後檐又旁兩柱當前後腋若
如其圖則無處爲堂矣竊謂棟之下與前後腋之下固
皆有柱檐之下則當爲橫梁以承檐而於前檐下爲堂
之正中棟下卽夾室之南壁柱在壁中後腋之下卽北
堂之東北角其外有東墉橫梁之上不能爲墉當有裝板以蔽風雨朱子殿屋厦屋
說曰橫棟之外有板下垂謂之搏風柱在東墉之北端惟前腋下一柱在

堂之東南角無壁其外爲玷此圖據東堂爲之也西堂
倣此

根

闌

圖

根

西扉

東扉

根

闌

闌右

中門

中門

案門之制上橫爲楣下橫爲闕兩旁長木爲棖中央短木爲闌闌一名櫺說文櫺門櫺也郭璞爾雅注作闕君臣出入皆由闌東賓客出入由闌西闌東闌西皆以棖闌之間爲中門惟乘車出入則由兩扉中央夾闌而行史記楚王欲民高其車孫叔敖教以高其闔曰乘車者皆君子君子不能數下車云云則車行夾闌可知賈公彥聘禮疏謂門有兩闌其誤顯然旣夕禮曰甸人抗重出自道薦馬馬出自道敖氏繼公曰車馬出自道者象其生平之出必中道也案道謂門道門之中央也喪車

輪卑迫地而行

地官遂師共蜚車之役注曰蜚車四輪迫地而行有似於蜚既夕禮商祝飾柩

疏曰柩車卽周禮蜚車四輪迫地

於其出也必先去闢故甸人抗重與

薦馬皆得出自道矣若生時乘車出入則必兩輪夾闢

而行也車軹高三尺三寸

軹穀末也戴東原曰當作軹

軸之下仍有

伏兔江氏曰伏兔置於輿底其長當一尺四寸有奇然

則闢之崇不過尺許而已朱子曰如今城門石墩言其

高如之也 闢爲門櫪與臬不同爾雅櫪謂之闢此謂

門櫪也又曰櫪謂之杙在地者謂之臬此謂平地之櫪

樹之以爲標識者也說文臬射準的也卽爾雅在地者

謂之臬矣又考工記匠人置槩以縣眡以景鄭注曰槩古文臬假借字於所平之地中央樹八尺之臬以縣正之眡之以其景將以正四方也引爾雅云在牆者謂之杙在地者謂之臬是臬與闌顯然不同郭璞謂臬卽門槩誤 說文柵門槩也徐鍇繫傳云謂門兩旁挾門短限 案柵門槩也者謂中央所樹短木也繫傳謂在門兩旁其誤與賈公彥同

闕亦名闕士冠禮闕西闕外鄭注曰闕闕也曲禮外言不入於柵注曰柵門限也是闕亦名闕與闌異物而同

名禮有闌西闕外之文則門有闌又有闕車行出入闌
可以不去闕則必去也名義考曰古者多乘車入門必
脫限

檐有二義說文檐秦名屋邊也齊謂之檐楚謂之栳此
指屋檐爲檐也聘禮公當檐再拜此指殿之內棟之外
橫梁爲檐也此二者皆非門檐之檐爾雅檐謂之梁郭
注曰門戶上橫梁也案爾雅檐謂之梁樞謂之棖樞達
北方謂之落時此皆據門而言此檐謂門檐也說文有
檐字解云門樞之橫木俞蔭甫辨爾雅檐謂之梁檐字

當作楣今案楣取覆冒之義與梁義異爾雅旣云謂之梁則不得作楣字說文繫傳云楣門楣橫木門上樞鼻所附或亦連兩鼻爲之以冒門楣也案冒門楣當云冒門樞蓋門之開閉在樞樞之運轉在鼻楣卽所以爲樞鼻也楣附於楣在門內而楣則見於外者也亦有以鐵爲樞鼻者則無所用楣矣